



12. august 2011

UKA 2011/62

Inatsisartut Suleriaasianni § 36 naapertorlugu apeqquteqaat aallaavigalugu oqallisissiaq imaattoq matumuuna saqqummiuppara:

Naqinnernik ilisarinnissinnaanngitsut ilikkagaqarfiunerusumik qanoq isiornikkut ilinniartinneqartarnissaannik aammalu immikkut sullinneqartarnissaat sutigit pitsaangorsaavigissanerlutigu apeqquteqaat aallaavigalugu oqallinnissamik siunnersuut
(Inatsisartunut ilaasorta, Ruth Heilmann Siumut)

Tunngavilersuut:

Inuiaqatigiinni ilinniarsimasut tamaasa pisariaqartippavut kissaatigaarpullu sapinngisamik inuiaqatigiinni ilinniagaqarniarlutik aallartittartussat amerlanerpaajussasut.

Inuit assigiinngitsuungatta ilai atuffarissiaarnerusarput aammali ilai allanit arriinnerusumik atuarniarnermikkut ineriartuuteqartarput ilaalu naqinnernik ilisarinnissinnaanerminnut ajornartorsiuteqartarlutik.

Naqinnernik ilisarinnissinnaanngitsut atuarsinnaanermullu kinguarsimasut nunatsinni ukiuni kingullerni qanoq iliuuseqarfigineqarnissaanik aallussiniarneq pisariaqartinneqartoq malunnarsigaluttuinnarpoq. Naliginnaasumik atuarfimmi meeqqat ukiut aappassaata naanerani atuarluarsinnaalerialertulereersarput. Meeqqat ilai siusissukkut naqinnernik ilisarinnissinnaanngitsuuneri paasiaarneqarsinnaasarput immikkullu isumagineqarnissaminnik periarfissinneqarsinnaasarlutik, kisiannili aamma meeqqat ilai kingusissukkut aatsaat paasineqartarput naqinnernik ilisarinnissinnaannginnerinik.

Pingaartumik Atuarfitsialaap atuutilerneratigut meeqqap qitiutinneqarluni atuartitaanerup ingerlanneqalernerani paasisat annertusiartortillugit naqinnernik ilisarinnissinnaanngitsut atugaat eqqummaariffiqineqartariaqarput.

Aperisariaqarporli ilumut taamatut inissisimasut qanoq ullumikkut iliuuseqarfigineqarpat? Nalunngilarpulli kommunit ilaat atuarfeqarnerup iluani pikkorissaanernik ingerlatsisartut pingaartumik atuarnermut kinguarsimasut taakkuunerusunut atuarluarsinnaalernissaannik suliniuteqartoqartarluni.

Ukuli naqinnernik ilisarinnissinnaanerminnik ajornartorsiuteqavissut qanormitaava ullumikkut periarfissaqartitaappat aammalu qanoq pitsaanerusumik qitiusumit atugassaqartitsinnaavugut naqinnernik ilisarinnissinnaanngitsunut iluaqutissamik.

Apeqqut taannarpiaq pillugu Naalackersuisut pingasut upernaq manna Maniitsumi innuttaasunik ataatsimiititsineranni innuttaasut ilaannit apeqqutigineqarmat Naalackersuisunit assut akiuminaatsinneqartoq maluginiarpara.

Atuartitaanermut Naalakkersuisoq isumaqarpoq ullumikkut iliuuseqartoqassaguni nunatsinniittut højskolit tamanna ingerlassinnaagaat.

Soorunami tamanna Højskoleni ingerlatissallugu iluatinnarpoq qularnanngilarlu aamma højskolini ingerlatsisut suliassaq kivissinnaajumallugu kajumissuseqarumaassasut.

Kisianni Højskolit ullumikkut aningaasaqarnerisa killiffiat ima kipiluttunartigisumiippoq allaat pisussaaffimmik iluani ingerlatsiniarneq ajornakusoortittarlugu.

Taamaattumik pilersaaruteqartoqassaguni aammalu erseqqissumik naqinnernik ilisarinnissinnaanngitsunut ilinniartitsinikkut immikkullu sammineqassappata avaqunneqarsinnaanngilaq ersarissumik pilersaarusiornissaq pisariaqartorujussuusoq.

Tamannalu Naalakkersuisut pimoorutivillugu iliuuseqarfigalugu aallartisartariaqaraat isumaqarpunga erseqqissumillu nalunaartoqartariaqarlunilu oqaluuserineqartariaqartoq ilumut højskoliniissappat qulakkeerniarneqassasoq ilinniartitsisoqarniarnikkut akissaqartitsinissaq, ilinniutissanut akissaqarnissaq aammalu nuna tamakkerlugu ilinniartitseriaaseq qanoq ittoq anguniarneqarnersoq ilusilersulertariaqarlugu. Naalakkersuisuusup oqarneratut højskolini tamanna ingerlanneqarsinnaasoq isumagissangunikkut ilanngullugu oqaluuserisariaqartutut pingaartutut isigaara tassalu aningaasatigut aammalu ilinniartitsisoqarniarnikkut aningaasartuuteqarnerulernissamut qanoq piareersimasoqartiginersoq ilanngullugu oqaluuseralugu aallartittoqartariaqartoq.

Qilanaaraa inatsisartoqatima naqinnernik ilisarinnissinnaanngitsut pillugit ilinniartitsissutigineqarnissamut isummersuutai tusassallugit aammalu oqallittoqarluarnissaannik kissaassivunga.